

telebista ♦ irratia

‘Sorginen laratza’ saioan atal berriak sartu dituzte

Sexologoa, lehiaketa, sukaldea eta ‘Bixente’ dira programaren berritasunak


Erredakzioa/ Donostia

Sorginen laratza ETB1-eko saioan atal berriak sartu dituzte aurtengo denboraldian. Urte hasieratik Luis Elberdin sexologoaren atala, Klaudio Landak aurkeztutako lehiaketa, sukaldearena eta *Bixente* pertsonaiarena dira saioko atal berriak.

ASTELEHENETIK ostegunera eskaintzen dute *Sorginen laratza* magazina, gauero, 22:30ak aldera, ETB1ean, zuzenean, Xabier Euzkitzek aurkeztuta. «Saio bizia eta freskoa den neurrian, berrikuntzak sartzen ari gara eta lanean dihardugu etengabe, hartara jendea harritzen jarraitzeko», adierazi du Itziar Azpeitia programaren zuzendariak.

«Freskotasuna eta barietatea» dira saioaren ardatz nagusiak, azaldu du Azpeitiak, «hainbat gai ukitzen dira, tono serio eta umoretsuan».

Luis Elberdin sexologoa asteen behin agertzen da. Sexuaren inguruko gai interesgarriak azaltzen ditu, eta, bide batez, ikus-entzuleen galdera eta zalantzak argitzen ere saiitzen da. Horretarako, saioko posta elektronikoa erabil dezakete ikusleek: sorginak@eitb.com.



Irailan hasi zen *Sorginen laratza*. Xabier Euzkitzek aurkeztu du, eta Klaudio Landak hainbat tartetan ageri da.

Gaurko saioan, adibidez, *lehenengo aldiari* buruz hitz egingo du Elberdinek.

Pertsonaia berri bat ere joaten da saiora astero: *Bixente*. Miramongo mantnimenduko arduraduna da bera, eta Ramon Agirre aktore ezagunak hezurmitzen du pertsonaia. Bizitzaren gaineko filosofia eta gogoeta egiten du Bixentek.

Klaudio Landak ere galtza bete lan dabil programan. Haren *txotxisukaldeak* lekua aurkitu du platoan. Janaria egiten den bitartean, sukaldea konfidentzia

eta elkarriketarako leku aproposa bihurtzen du. Landak Eudene Ormazabal aurkeztutako eta Martin Berasategi sukaldaria izan ditu dagoneko bere txokoa. Aste honetan, berriz, Txaro Arteaga Emakundeko zuzendaria izango da.

Lehiaketari dagokionez, ere gustura agertu da Azpeitia. «Publizitate erakargarria erakusteko aitzakia da eta jendeak une alaia pasatzeko eta sari erakargarria irabazteko parada eskaintzen du».

Bestalde, aurkezte taldera Gorka Otxoa aktorea batuko

zaie laster. Baina *Sorginen laratzako* lan taldeak beste berrikuntza batzuk ere badi-tu buruan. Beste gauza batzuen artean, hemendik gutxira fikziozko tarte bat egiteko lanean ari dira.

Berrikuntzez gainera, saioko hainbat atal finkatu egin direla ere nabarmendu du Azpeitiak: «Asteko debateak laguntzaile talde sendoa lortu du; asteleheneko futbol tertuliak bere publikoa du; Irenek ere hor jarraitzen du bere misioekin, kaleko hamaika trabari aurre eginez...».

Interneten enkantean erosteko publizitatea egiten duen telebista iragarki bat kentzea nahi du EKAK

■ *‘Bizitza honetan denak du prezioa’ leloa zabaltzen duela salatu du kontsumitzaileen elkarteak*

Kristina Martin / Bilbo

«BIZITZA honetan denak du prezioa» mezua zabaltzen duen telebista iragarki bat berriro ez emititzeko ekintza legalak egingo ditu EKAK, Euskal Herriko Kontsumitzaileen Elkarteak. Interneten bidez enkantean erosteko aukera zabaltzen du aipatutako iragarkiak, eta duela egun batzuk kate pri-

batu zein publikoetan emititzen ari da.

«Iragarkiak zabaltzen duen mezua legez kanpokoa ote den aztertzen ari gara, ikuslearen duintasuna urra dezakeelako eta nazioartean onartuta dauden baloreen kontra joan daitekeelako», azaldu du kontsumitzaileen elkarteak, ohar baten bidez. «Legez kanpokoa den jakiteko enpresa iragarlearekin,

hedabideekin eta erakundeekin harremanetan jarriko gara», jakinarazi du EKAK.

Iragarkian eraikin bat sutan agertzen da. Bizilagunek suhiltzaileen laguntza eskuratzeko enkantea egiten dute, eta suhiltzaileak gehien eskaintzen duenaren gaitasuna doaz. Baina, bizilagunak bere burua leihotik botatzean, beste batek

eskaintza gaitzen du eta suhiltzaileak horrengana jotzen dute, lehengo emakumeak lurra jotzen duen bitartean.

EKArek iritziz, «iragarki hauek gizakien berdintasun eta errespeturako oinarritzko eskubideak urratzen dituzte, eta oso larria da telebista kateek, bereziki publikoek, halako publizitatea onartzea».

laburrean

Alvaro Augustin izendatu dute T5ko emisio zuzendari

Alvaro Augustin da atzoz geroztik Tele 5 telebista pribatuko emisio zuzendaria. Orain arte Mikel Lejarza bizkaitarrak bete du kargu hori, baina T5ko zuzendari nagusi ardurarekin batera. Bestalde, Andrea Goretti Gestioko zuzendariorde izendatu dute. Massimo Musolinok zuen ardura hori lehen, eta egun Mediaset-en egiten du lan Musolinok.

Michel Gondry ‘Metrópolis’-en

Michel Gondry errealizadoreari buruzko dokumentala emango dute gaur gauean *Metrópolis* saioan, Espainiako Teleistako bigarren katean (La2). Oui Oui taldearekin batera, hainbat bilduma kaleratu zituen 80ko hamarkadan. Bideo-klip eta *spots* iragarki ugari zuzendu zituen berak.

Hiriko bizimodua, antolaketa eta ohiturak aztergai ‘Ikusgela’-n

Hirian ondo bizitzeko moduko tokirik ba ote dauden aztertuko dute gaur *Ikusgela* saioan, goizean. Hirien aukera eta eskaintza oparoetatik harago, gure bizitzarako kaltegarriak izan daitezkeen bizimolde, antolaketa eta ohi-turei erreparatuko die bideo didaktikoak. Jaur-laritzako Hezkuntza Sailak eta ETBk sinatutako akordioaren bidez egiten du saio hau Pausoka ekoizte-txeak. Batez ere haur eta gazteei zuzendutako programa da.

Robotak etxeko lanetan ‘Forum’ saioan

Natividad Garcia domotika-ko adituari egingo diote gaur goizean elkarriketa *Forum* ETB2ko saioan. Robotak eta teknologia berriak etxeko lanetara egokitzeaz arduratzen da domotika. Solasaldian, etxeko lanetarako teknika berriak-eta nola egokitzen diren aztertuko dute.